

四庫全書

史部

欽定四庫全書

史部
元和郡縣志卷六
四至

詳校官編修臣曹城

檢討臣德生覆勘

總校官庶吉士臣倉聖脉

校對官中書臣王家賓

謄錄監生臣陸肇修

欽定四庫全書

元和郡縣志卷四

唐李吉甫撰

關內道四

鄜州洛交上

開元戶三萬一百八十五
元和戶七百五十

鄉五十一
鄉十二

今為鄜坊觀察使理所
管鄜州坊州丹州延州
管縣二十三都管戶四

千三百四十七

禹貢雍州之域春秋時屬秦至始皇時地屬上郡漢為上郡雕陰縣之地按漢雕陰在今洛交縣北三十里雕陰故城是也暨晉陷于戎羯不置州郡苻姚置杏城鎮後魏孝文帝廢鎮改為東秦州孝明帝改為北華州廢帝改為鄜州因秦文公夢黃蛇自天降屬于地遂于鄜衍立鄜時為名隋大業二年改為鄜城郡後改為上郡武德元年復為鄜州貞觀二年加為都督府十六年罷府州城舊名立交城

州境

東西二百六十七里
南北二百七十三里

八到

東南至上都四百七十七里
東南至東都九百五十九里

南至坊州一百二十五里

西至慶州三百九十八里

北至丹州一百八十三里

北至延州一百五十里

貢賦

開元貢賦

龍鬚席
布麻

管縣五

洛交

洛川

三川

直羅

甘泉

洛交縣

紫

本漢雕陰縣地屬上郡雕山在西南故曰雕陰魏省上郡晉為戎狄所居苻堅時為長城縣後魏及周為三川縣隋開皇十六年分三川洛川二縣置洛交縣屬鄜州洛水之交故曰洛交皇朝因之

洛水在縣南一里

秦長城在縣東北三十里

偽夏太后城在縣西三十六里赫連勃勃聞劉裕滅姚泓命其子義真等守長安大悅自將兵入長安留太后

于此築城以居

洛川縣

上西北至州六十里

本漢郿縣地後秦姚萇于此置洛川縣以縣界有洛川水為名後魏置敷城郡隋開皇三年罷郡以縣屬郿州

三川縣

中東北至州六十里

本漢翟道縣地古三水郡以華池水黑源水及洛水三川同會因為名苻堅時于長城原置長城縣屬長城郡後魏廢帝改為三川屬中部郡隋開皇三年屬郿州

直羅縣

中下東至州一百里

本漢雕陰縣地後魏因之魏省雕陰縣晉時戎狄所居
後魏置三川郡隋開皇三年使戶部尚書崔仲方築城
以居之城枕羅原水其川平直故名直羅城武德三年
分三川洛交于此置縣因城為名

大槃山在縣西北一百一十里

羅川水在縣南二里

甘泉縣

中下南至州七十五里

武德元年分洛交縣于伏陸城置縣取城為名天寶元年改為甘泉縣本漢雕陰縣城今在縣南四十里

伏陸山在縣理東北有阿伏斤谷其水出又潛流伏川陸故號伏陸天寶元年改為甘川谷

坊州 中部下

開元戶一萬五千七百一十五 鄉四十四
元和戶一千八百四十三 鄉十二

禹貢雍州之域古之翟國秦屬內史漢為左馮翊翟道縣之地魏晉陷于夷狄不置郡縣劉石苻姚時于今州

理西七里置杏城鎮常以兵守之後魏孝文帝改鎮為
東秦州孝明帝改為北華州廢帝改為鄜州元皇帝高
之以周武帝時天和七年放牧于今州界置馬坊結構
之處尚存武德二年高祖駕幸于此聖情永感因置坊
州取馬坊為名

州境東西三百八十九里
南北一百三十九里

八到東至上都三百五十里
東至東都九百里

東南至同州二百五十里
西南至邠州三百一十里

東北至丹州二百六十里
北至鄜州一百五十里

貢賦

開元貢

龍鬚席

象麻

弓弦麻

案前同州載開元貢賦復載元和貢而他州

無之當是同者不複載也此坊州與後靈

會鹽諸州并不載開元賦必由傳寫遺缺

管縣四

中部

宜君

昇平

鄜城

中部縣

上

本漢翟道縣之地屬左馮翊魏晉戎翟所居後秦姚興
于今縣南置中部縣後魏文帝移入杏城後周改為內

郡屬鄜州武德二年置坊州改為中部

杏城在縣西南五里相傳云漢將韓胡伐杏木為柵以抗北狄因以為名

宜君縣

上東北至州一百里

前秦苻堅于殺襁縣故城置宜君護軍後魏太武帝改為宜君縣文帝大統五年又移于今華原縣北貞觀十七年廢縣地入雍州二十年置玉華宮仍于宮所置宜君縣屬雍州永徽二年與宮同廢龍朔三年坊州刺史

寶師倫奏再置

玉華宮在縣北四里貞觀二十年奉敕營造其地本縣人秦小龍宅太宗云小龍出大龍入當時以為清涼勝于九成宮永徽二年有詔廢宮為寺便以玉華為名寺內有肅成殿永徽中奉敕令玄奘法師于此院譯經每言此寺即閤淨之咒率天也

昇平縣

上東至州九十里

天寶十二年刺史羅希奭奏割宜君縣西北三鄉置去

宜君縣三十五里

鄜城縣

上東至州一百里

本漢鄜縣地屬左馮翊後漢省後魏于今縣理置鄜城縣屬鄜城郡隋大業元年改屬坊州

丹州 成平上

開元戶一萬二千四百二十二
元和戶八百十六

鄉三十五
鄉十二

禹貢雍州之域春秋時為白翟所居

隋圖經云義川本春秋時白狄地今

其俗云丹州白室胡頭漢舌其狀是胡其言習中夏白室白狄語訛耳近代號為步落稽胡自言白狄之後

秦置三十六郡屬上郡漢因之魏文帝省上郡其地晉
時戎狄居之苻姚時為三堡鎮後魏文帝大統三年割
鄜延二州地置汾州理三堡鎮廢帝以河東汾州同名
改為丹州因丹陽川為名領義川樂川縣隋大業三年
廢丹州于義川縣置延平縣十三年為胡人劉步祿所
據義寧元年于義川縣置丹陽郡武德元年改為丹州
九年置都督府貞觀元年罷府為州永徽二年移于赤

石川

州境

東西一百九十九里
南北一百七十三里

八到

西南至上都五百五十里
東南至東都九百二十里

東至同州三百五十里

南至坊州二百六十里

西至鄜州一百八十里

北至延州二百五十里

貢賦

開元貢 麝香 蠟燭 龍鬚席
賦 布 麻

管縣四

義川 雲巖 汾川 咸寧

義川縣 上郭下

本秦上郡之地二漢因之魏省上郡其地至晉為戎狄所居後魏文帝大統三年置義川縣屬義川郡因川為名隋大業三年廢丹州義川屬延州義寧元年于舊城復置丹陽郡縣在城內永徽二年移于今理

雲巖縣

中東南至州七十三里

武德元年分義川縣置在庫利川南有雲巖山因以為名

庫利川在縣郭南昔有奴賊居此川內稽胡呼奴為庫

利因名之

汾川縣

上西南至州七十里

本秦上郡地二漢因之魏省上郡後魏孝文帝置安平縣理薛川屬樂川郡文帝改安平為汾川隋開皇三年罷郡縣屬丹州大業二年屬延州武德元年復屬丹州黃河在縣東七里河岸頓狹狀似槽形鄉人呼為石槽蓋禹治水鑿石導河之處石槽長一千步闊三十步懸水奔流鼃鼃魚鼃所不能游

咸寧縣

中下西南至州四十五里

本秦上郡之地後魏孝文帝太和十八年于白水川置永寧縣屬義川郡在今縣東二十里永寧故縣是也文帝改為太平縣移于今所隋開皇三年罷郡屬丹州十八年改太平縣為咸寧以界內有咸寧鎮為名

延州 延安望中都督府

開元戶一萬六千三百四十五
元和戶九百三十八

鄉六十
鄉十八

禹貢雍州之域春秋時白翟所居秦置三十六郡屬上

郡在漢為上郡高奴縣之地今州理即上郡高奴縣之城也項羽三分秦地以董翳為翟王都高奴即其地也魏省上郡至晉陷為戎狄其後屬赫連勃勃後魏滅赫連昌以屬統萬鎮孝文帝置金明郡宣武帝置東夏州廢帝改為延州以界內延水為名置總管管丹延綏三州隋開皇八年廢總管但為延州煬帝以為延安郡隋氏喪亂陷于殘寇武德元年百姓歸化置總管府開元二年為都督府尋罷府為州

州境

東西四百四十九里
南北三百五十一里

八到

西南至上都六百七十四里
東南至東都一千一百里

東至隰州三百六十里

西至廊州一百五十里

西南至慶州四百四十里

北至夏州四百里

貢賦

開元貢
蜜蠟
麝香

賦

布
麻

管縣十

膚施

延長

臨真

金明

豐林

延川

敷政

延昌

延水

門山

膚施縣 上郭下

本漢舊縣屬上郡趙武靈王滅齊中山遷其人于膚施
漢書曰匈奴南侵至朝那膚施即其處也魏晉陷戎狄
隋煬帝大業二年分豐林金明二縣于此置膚施縣復
舊名也屬延安郡皇朝因之

縣有五龍山帝原水黃帝祠

清水俗名去斤水北自金明縣界流入地理志謂之清

水其肥可燃鮮卑謂清水為去斤水

斤一作筋

延長縣

中東至州一百三十里

本秦膚施縣地後魏廢帝元年于丘頭原置廣安縣隋
仁壽元年以廣字犯皇太子名改為延安縣大業末廢
貞觀六年又置移于府北去斤川今縣是也廣德二年
改為延長

臨真縣

中西北至州一百四十里

本漢高奴縣地後魏文成帝置臨真縣屬偏城郡周武
帝天和元年稽胡叛攻破郡城遂移于今理隋開皇元

年改為臨真縣屬延安郡皇朝因之

金明縣

中東南至州四十八里

本漢高奴縣地後魏太武帝于此置廣洛縣屬金明郡
隋開皇四年屬延州後仁壽元年以太子名廣改為金
明縣大業十三年省入膚施縣武德六年又分置金明
縣

豐林縣

中下西至州三十里

本漢高奴縣地後魏孝文帝置廣武縣屬偏城郡在今

理東四十里周宣帝改為豐林屬延州皇朝因之

瑠璃山在縣北九十五里

延川縣

中西南至州一百五十里

本秦臨河縣地漢不改後漢省後魏分安人縣于此地
置文安縣隋文帝改為延川取吐延川為名皇朝因之
吐延水北自綏州綏德縣流入

敷政縣

中下東北至州一百五十里

本漢高奴縣地後魏太和初置因城縣隋開皇六年于

其中置金城鎮武德二年移縣就鎮因改為金城縣天寶元年改敷政

延昌縣

中南至州一百七十六里

本漢高奴縣地隋開皇三年于此置朔方鎮十年以北有朔方鎮遂廢貞觀九年置罷交鎮十年又置罷交縣屬延州取城北罷交谷為名天寶元年改為延昌縣塞門鎮在縣西北二十里鎮本在夏州寧朔縣界開元二年移就蘆子關南金鎮所安置

蘆子關屬夏州北去鎮一十八里

延水縣

中下西至州二百一十五里

本秦臨河縣之地史記秦滅六國使蒙恬北擊匈奴悉收河內地因河為塞築四十四縣城臨河徙謫吏以戍之漢因之在今縣理北十五里臨河故城是也後魏于其中置安人縣并安人鎮屬東夏州隋文帝廢鎮置安人戍武德二年重置安人縣屬延州貞觀二十三年改為延水縣取吐延水為名

黃河在縣東八里

門山縣

中西至州二百十五里

本漢定陽縣地周宣帝大象元年分汾州雲巖二縣于
今縣南六里置北有山形似門因以為名武德八年于
今縣北五里宋斯堡置丹州廣德二年割屬延州
黃河在縣東三十五里

靈州

靈武大都督府

開元戶九千六百六
鄉二十七
案元和戶鄉數傳寫缺

今為靈武節度使理所

管靈州會州鹽州
管縣十

禹貢雍州之域春秋及戰國屬秦秦并天下為北地郡
漢時為富平縣之地後漢安帝永初五年西羌大擾詔
令郡人移理池陽順帝永建四年歸舊土其城赫連勃
勃所置果園今桃李千餘株鬱然猶在後魏太武帝平
赫連昌置薄骨律鎮後改置靈州以州在河渚之中水
上下未嘗陷沒故號靈州周置總管府隋大業元年罷
府為靈州三年又改為靈武郡武德元年又改為靈州

仍置總管七年改為都督府開元二十一年于邊境置

節度使以遏四夷靈州常為朔方節度理所朔方節度管兵六萬

四千七百八人馬二萬四千統經畧軍靈武郡城內管兵二萬七千人

馬三豐安軍靈武郡西黃河外一百八十二里萬歲定

千匹通天初置管兵八千人馬一千三百匹

遠東城靈武郡東北二百里黃河外景龍中韓公張仁愿置管兵七千人馬三千匹西城原

郡北黃河外八十里景龍中韓公張仁愿置管兵七千人馬一千七百匹西南去理所一千餘里

都護府亦曰中受降城景龍中韓公張仁愿于黃河北岸置管兵六千人馬二千匹西南去理所一千

三百東城榆林郡東北二百里景龍中韓公張仁愿置

里管兵七千人馬一千七百匹西南去理所一

千六百餘里

振武軍

單于都護府城內天寶中王忠嗣置管兵九千人馬一千六百匹西南去理所

一千七百里

天寶元年又改為靈武郡至德元年肅宗幸靈

武即位陞為大都督府乾元元年復為靈州

州境

東西五百八十里
南北八十里

八到

東南至上都一千二百五十里
東南至東都二千二百七十里

東南至鹽州三百里

東南至慶州六百二十里

西南至涼州九百里

北至磧南彌娥川水一千里

貢賦

開元貢 甘草 紅花 青蟲子 野馬皮
鹿皮 赤檀 鹿角膠 花蓂蓉

烏翎 雞筋
麝香 馬鞭

管縣六

迴樂 靈武 保靜 懷遠 鳴沙 溫池

迴樂縣

望郭下

本漢富平縣地屬北地郡在今縣理西南富平故城是也後漢置迴樂縣枕黃河後魏刁雍為薄骨律鎮將上表請開富平西三十里艾山舊渠通河水溉公私田四萬餘頃人大獲其利太平真君七年雍又上表論漕運

奉詔平高安定統萬

平高今屬原州安定
今涇州統萬今夏州

及臣所守四

鎮出車五千乘運穀五十萬斛付沃野鎮以供軍糧臣
鎮去沃野鎮八百里道多深沙輕車往來猶以為難今
載穀二十五斛每至深沙必至滯陷又穀在河西轉至
沃野越渡大河計五千乘運十萬斛百餘日乃得一返
大廢生人耕墾之業車牛艱阻難可全至一歲不過二
運五十萬斛乃經三年臣聞鄭白之渠遠引淮海之粟
汧流數千里周年乃得一至猶稱國有儲糧人用安樂

今求於牽屯山河水之次造船二百艘二船為一舫一舫勝二千斛一舫十人計須千人臣鎮內之兵卒皆習水一運二十萬斛方舟順流五日而至自沃野牽上十日還到計用人工輕于車運十倍有餘不費牛力又不廢田孝文帝善之下詔曰非但一運自可永以為式溫泉鹽池在縣南一百八十三里周迴三十一里薄骨律渠在縣南六十里溉田一千餘頃

安樂川在靈州南稍東一百八十里

長樂山舊名達樂山亦曰鐸落山以山下有鐸落泉水故名舊吐渾部落所居今土蕃置兵守之

靈武縣

上東南至州八十八里

本漢富平縣之地後魏破赫連昌收胡戶徙之因號胡地城天和中于州東北置建安縣隋開皇十八年改為大潤縣仁壽元年改為靈武縣移入胡地城安置黃河自迴樂縣界流入

千金陂在縣北四十二里長五十里闊十里

漢渠在縣南五十里從漢渠北流四十餘里始為千金大陂其左右又有胡渠御史百家等八渠溉田五百餘頃

保靜縣

上西南至州六十里

本漢富平縣地後魏立弘靜鎮徙關東漢人以充屯田俗謂之漢城隋改置弘靜縣神龍元年改為安靜至德元年改為保靜

賀蘭山在縣西九十三里山有樹木青白望如駿馬北

人呼駁為賀蘭其山與河東望雲山形勢相接迤邐向北經靈武縣又西北經保靜西又北經懷遠縣西又北經定遠城西又東北抵河其抵河之處亦名乞伏山在黃河西從首至尾有像月形南北約長五百餘里真邊城之鉅防山之東河之西有平田數千頃可引水灌溉如盡收地利足以贍給軍儲也

懷遠縣

上南至州一百二十五里

在州東北隔河一百二十里本名飲汗城赫連勃勃以

此為麗子園後魏給百姓立為懷遠縣其城儀鳳二年
為河水汎損三年于故城西更築新城

縣有鹽池三所隋廢紅桃鹽池鹽色似桃花在縣西三

百二十里武平鹽池在縣西北一十二里河地鹽池在

縣東北一百四十五里

紫河地一作河池

廢靈武城在縣東北隔河一百里其城本蒙恬所築古
謂之渾懷障即渾懷所理道故謂之靈武

新堡在縣西北四十里永昌元年置堡內安置防禦軍

二千五百人糧五萬石舊名千金堡今名新堡

鳴沙縣

上東北至州一百二十里

本漢富平縣地屬安定郡在今縣理東二百里原州周保定二年于此置會州建德六年廢郡立鳴沙鎮隋開皇十九年置環州以大河環曲為名仍立鳴沙縣屬焉大業三年罷環州以縣屬靈武郡貞觀六年復置環州九年州廢以縣屬靈州神龍二年冬為默啜所寇因而荒廢遂移縣于廢豐安城即今縣理是西枕黃河人馬

行經此沙隨路有聲異于餘沙故號鳴沙

溫池縣

上西北至州一百八十里

神龍五年置縣側有鹽池

定遠廢城在州東北二里即漢北地郡方渠縣之地先天二年郭元振以西城遼闊豐安勢孤中間千里無城烽候杳渺故置此城募有兵健五千五百人以鎮之其後信安王禕更築羊馬城幅員一十四里

經畧軍在夏州西北三百里天寶中王忠嗣奏于榆多

勃城置軍今屬靈武節度本屬夏州南去靈武六百五十餘里元和九年于此城新置宥州

會州 會寧下府

開元戶三千五百四十

鄉六

案元和戶鄉數傳寫缺

禹貢雍州之域古西羌地周太祖為西魏相來巡會師于此土人張信罄資饗六軍太祖悅因命置州以會為名周武帝保定二年廢州改為會防隋開皇元年改防為鎮武德二年討平李軌置西會州貞觀八年以此州

倉儲殷實改為粟州其年又為會州天寶元年改為會

靈郡乾元元年復為會州

州境

東西五百一十里
南北三百三十里

八到

東南至上都一千一百九十里
東南至東都一千五百里

東南至原州三百九十里

西南至蘭州三百八十里

西北至涼州五百四十里

東北至靈州五百三十里

貢賦

開元貢
覆鞍氈

管縣二

會寧 烏蘭

會寧縣

上

本漢鶉陰縣地周太祖置會寧縣屬會州隋大業二年改為涼川縣武德二年又改為會寧

黃河堰開元七年河流漸逼州城刺史安敬忠率團練兵起作拔河水向西北流遂免淹沒

會寧關東南去州一百八十里

河西地去州一百二十里其地春夏因雨水生鹽雨多

鹽少雨少鹽多遠望似河故名河地

案河地一作河池

烏蘭縣

上東南至州一百四十里

本漢祖厲縣地屬安定郡後漢屬武威郡前涼張軌收其縣人于涼州故武威縣側近別置祖厲縣周武帝西巡于此置烏蘭關又置縣在會寧關東南四里舊城內沙石不堪久居天授二年移于東北七里平川置

鹽州

五原中府

開元戶三千二十五鄉七
案元和戶鄉數傳寫缺

禹貢雍州之域春秋時為戎狄所居地史記梁山經漆

之北有義渠胸衍謂此也及始皇并天下屬梁州案秦無梁

州此有誤一本改梁為涼亦非據通典鹽州秦漢屬北地郡漢武帝元朔二年置五

原郡地有原五所故號五原至晉地沒赫連勃勃後魏

平之改為西安州以其北有鹽池又改為鹽州隋大業

三年為鹽川郡貞觀二年討平梁師都置鹽州天寶元

年改為五原郡乾元元年復為鹽州

州境東西二百四十五里南北二百七十里

八到南至上都一千五十里
東至東都一千七百三十里

南至慶州四百五十里

西北至靈州三百里

西北取烏池黑浮圖堡私路至靈州四百里
東北至經畧軍四百里

貢賦開元貢鹽

管縣二

五原白池

五原縣上

本漢馬領縣地貞觀二年與州同置五原謂龍遊原也

地千原青嶺原可嵐貞原橫槽原也

鹽池四所一烏池二白池三細頂池四瓦窰池烏白二池出鹽今度支收耀瓦窰細頂並廢

白池縣

上東南至州九十里

景龍三年敕置以地近白池因以為名

元和郡縣志卷四

欽定四庫全書

元和郡縣志卷五

唐 李吉甫 撰

關內道 五

夏州 朔方中都督府

開元戶六千一百三十二 鄉二十
元和戶三千一百 鄉八

今為夏綏銀節度使理所 管夏州綏州銀州
宥州 管縣三十

按此與後振武節度使豐州都防禦使不載都管
戶數又銀麟勝豐諸州不載元和戶鄉數俱由傳

寫遺

缺

禹貢雍州之域春秋及戰國時屬魏秦并天下置三十六郡屬上郡漢武帝分置朔方郡後漢建武二十年罷二十七年復置靈帝末羗胡亂塞下皆空至晉末赫連勃勃于今州理僭稱大夏勃勃字屈子一作屈丐朔方匈奴人父衛辰符堅時為西單于遂有朔方之地辰後為後魏所殺勃勃殺高平沒奕干并其衆自稱天王于朔水之北黑水之南營起都城即今州理是也名曰統萬城

至子昌為後魏太武帝所滅置統萬鎮孝文帝太和十一年改置夏州隋大業元年以為朔方郡隋末為賊帥梁師都所據貞觀二年討平之改為夏州置都督府天寶元年改為朔方郡乾元元年復為夏州也

州境

東西二百一十五里
南北七十里

八到

東南至上都一千五十里
東南至東都一千八百五十里

東至銀州一百八十里

東南至延州四百里

西南至鹽州三百里

西北至豐州七百五十里

貢賦

開元貢賦

角弓

布麻

氈

酥

苴

霜薺

管縣四

朔方 德靜 寧朔 長澤

朔方縣

上郭下

本漢舊縣今縣理北什貢故城是漢末荒廢後魏更置
巖綠縣隋因之貞觀二年改為朔方縣

契吳山在縣北七十里十六國春秋曰赫連勃勃北遊
契吳歎曰美哉臨廣澤而帶清流吾行地多矣自馬領

以北大河以南未之有也

無定河一名朔水一名奢延水源出縣南百步赫連勃勃于此水之北黑水之南改築大城名統萬城今按州南無奢延水惟無定河即奢延水也古今異名耳

烏水出縣黑澗東注奢延水本名黑水避周太祖諱改名烏水初統萬城成勃勃下書曰今都城已建宜立美名朕方統一天下君臨萬國宜以統萬為名其城土色白而牢固有九堞峻險非力可攻酈道元云統萬城蒸

土加功雉堞雖久崇墉若新

什賁故城在縣理北即漢朔方縣之故城也詩所謂王
命南仲城彼朔方是也漢武帝元朔二年收河南地置
朔方五原郡使校尉蘇建築朔方公孫弘數諫以為罷
敞中國以奉無用之地願罷之上使朱買臣難弘發十
策弘不得一由是卒城之亦謂此也自漢至今常為關
中根本什賁之號蓋蕃語也城西南有二鹽池大而青
白青者名曰青鹽一名戎鹽入藥分也

故白城一名契吳城在縣北一百二十五里契吳山赫連中因山所築勃勃常所歎美故其子昌因立此城以立勃勃之廟

勃勃墓在縣西二十五里隋置白城鎮後廢

德靜縣

中下西南至州八十里

蓋漢朔方縣地周武帝于此置彌渾戍南有彌渾水因名隋改為德靜鎮尋廢鎮為縣皇朝因之

無定河自朔方縣界流入

秦長城在縣西一里

寧朔縣

中下西北至州一百二十里

本漢朔方地周于此置寧朔縣屬化政郡自隋罷郡以

縣屬夏州皇朝因之

賀蘭山在縣東北三十里

秦長城在縣北十里

長澤縣

中下東北至州一百二十里

本漢三封縣地屬朔方郡今縣北二十里三封故城是

也後魏于此置長澤縣屬闡熙郡隋罷郡以縣屬夏州
皇朝因之

闡熙故城在今縣西南二十里

百井戌在縣南八十里勃勃與禿髮傉檀戰處

胡洛鹽池在縣北五百里周迴三十里亦謂之獨樂池
聲相近也漢有鹽官

綏州 上郡下

開元戶八千七百五十
元和戶八百四十

鄉二十八
鄉一十二

禹貢雍州之域春秋時其地為白狄所居七國時屬魏
史記曰魏有西河上郡秦并天下始皇置三十六郡為
上郡漢高帝元年項羽立董翳為翟王後廢復為上郡
漢武帝徵六郡良家子為羽林郎上郡即其一也按秦
上郡城在今州理東南五十里上郡故城是也自後漢
末以來荒廢年久俗是稽胡及赫連勃勃都于統萬上
郡之地又為赫連部落所居後魏明帝神龜元年東夏
州刺史張邵于此置上郡廢帝元年于郡內分置綏州

隋煬帝又改為上州後又改為雕陰郡以雕山在西南故名隋亂陷賊武德三年百姓歸化遂于延州豐林縣置綏州總管貞觀二年討平梁師都廢府移州于今理

州境

按州境里數傳寫缺

八到

西南至上都一千里
東南至東都一千四百里

東至石州二百七十里

西至夏州三百六十里

西南至延州三百三十里

西北至銀州一百六十里

東北至太原五百九十里

貢賦

開元貢賦

蠟布

麻

管縣五

龍泉 延福 綏德 城平 大斌

龍泉縣

中下郭下

本秦膚施縣地二漢同後魏于此置上縣取郡為名開皇三年上縣屬綏州大業二年改綏州為上郡又改為雕陰郡上縣咸屬焉皇朝因而不改天寶元年改為龍泉

疏屬山亦名雕陰山即山海經云貳負之臣曰危與貳負殺寡窳帝乃梏之疏屬山即此也

無定河一名奢延水自銀州撫寧縣界流入

州城貞觀元年築實中四面石堦東面高八十尺西面高百四十尺南面高四十尺北面高百二十尺周廻四里二百步

上郡故城在縣東南五十里始皇使太子扶蘇監蒙恬于上郡即此處也

吳兒城在縣西北四十里初赫連勃勃破劉裕子義真于長安遂膚其人築此城以居之號吳兒城

延福縣

中下西至州一百一十里

本秦膚施縣地後魏置延陵縣理延陵村隋文帝改為延福皇朝因之

綏德縣

中下北至州一百里

本秦上郡之地二漢不改魏省上郡後魏文帝分上郡南界丘尼谷置綏德縣隋不改皇朝因之武德二年移

于吐延水北即今理是也

城平縣

中下東北至州二百里

本秦膚施縣二漢不改後魏孝明帝于今縣理西三十里庫仁川置城中縣隋改為城平縣自庫仁川移于今理屬上郡皇朝因之

大斌縣

中下東至州一百一十里

本秦膚施縣之地後魏孝明帝神龜元年于今縣東五里置大斌縣屬上郡周隋不改武德七年于今城平縣

界魏平故城改置因隋舊名大斌者取稽胡懷化文武
雜半之義

銀州 銀川下

按開元戶六千一百二十 鄉十九

禹貢雍州之域春秋時屬白狄地秦并天下始皇分三
十六郡屬上郡漢為河西郡圖陰縣之地晉十六國時
為戎狄所屬符秦建元元年自驄馬城巡撫戎狄其城
即今州理城是也周武帝保定二年分置銀州因谷為

名舊有人牧驄馬于此谷狄語驄馬為乞銀隋大業二年廢銀州縣屬雕陰郡隋末陷于寇賊貞觀二年梁師都都于此重置銀州天寶元年為銀州郡乾元元年復為銀州

州境

東西二百七十一里
南北三百二十八里

八到

西南至上都一千六百里
東南至東都一千四百里

東至石州界黃河一百六十里
東南至綏州一百六十里

西至夏州一百八十里
東北至麟州三百里

貢賦

開元貢

女
藉布

粟

賦

布

麻

管縣四

儒林 真鄉 開光 撫寧

儒林縣

中郭下

本漢固陰縣地以其在固水之陰故名隋開皇三年于此置儒林縣屬銀州大業二年廢銀州以縣屬雕陰郡貞觀二年重置銀州縣又屬焉

無定河自夏州界流入

真鄉縣

中下西至州一百里

漢園陰縣地周武帝保定二年置今縣屬銀州皇朝因之

茹蘆水源出縣理西北

開光縣

中下西南至州二百里

漢園陰縣地周武帝保定二年于今縣理置開光郡宣帝大象二年廢郡置開光縣屬撫寧郡隋開皇三年罷郡以縣屬銀州皇朝因之

撫寧縣

中下北至州八十里

本漢圓陰縣地後魏廢帝于縣東撫寧故城置撫寧縣屬撫寧郡隋開皇三年廢郡以縣移于今理屬銀州皇朝因之

無定河在縣北二十里

廢宥州

在鹽州東北三百里在夏州西北三百里

開元二十六年置寶應以

後廢事本末具新宥州

新宥州

上

本在鹽州北三百里初調露元年于靈州南界置魯麗
含塞依契等六州以處突厥降戶時人謂之六胡州長
安四年併為匡長二州神龍三年復置蘭池都督府在
鹽州白池縣北八十里仍分六州各為一縣以隸之開
元十一年康待賓叛亂克定後遷其人于河南江淮諸
州二十六年還其餘黨遂于此置宥州以寬宥為名也
後為寧朔郡領縣三懷德延恩歸仁天寶中宥州寄理
經略軍寶應以後因循遂廢由是昆夷党項屢來寇擾

元和八年冬回鶻南過磧取西城柳谷路討吐蕃西城防禦使周懷義表至朝廷大恐以為回鶻聲言討吐蕃意是為寇惟中書侍郎平章事李吉甫以為回鶻入寇且當斷絕和事不應便來犯邊今之多士居平則橫生異議深沮邊計及聞邊警又承虛聲以洶朝廷冀因幾危搖動時事但當設備不足為慮因請自夏州至天德軍復置廢館一十一所以通急驛又請夏州騎士五百人營于經略故城應援驛使兼護党項部落上悉從之

又上言曰國家舊置六胡州在靈州界內開元中廢六州置宥州以領諸降戶天寶末宥州寄理于經略軍蓋謂居中可以總統蕃部北接天德南據夏州今經略軍遠礙靈武道路乖越又不置軍鎮非舊制也請置宥州理經略軍至九年五月詔復于經略軍城置宥州乃為上州于州郭下置延恩縣為上縣改隸夏綏銀觀察使取廊城神策行營兵馬使鄭杲下兵士并家九千人以實經略軍又置州之日版築之下掘得釜二百五十四

口悉堪烹飪識者以為暗合前賢之規模亦足以彰玄
化之所感也其金並散給諸營以資軍用又頃年每有
回鶻消息常須經太原取驛路至闕下及奏報到已失
事宜今自新宥州北至天德置新館十一所從天德取
夏州垂傳奏事四日餘便至京師

州境

按州境里
數傳寫缺

八到

東南取夏州路至上都一千三百里
東南至東都二千一百里

東南至夏州三百二十里
西南至廢宥州三百里

東至麟州六百里

西南至靈州六百五十里

北至天德軍六百里

東北至中受降城五百六十里

南至鹽州六百里

管縣一

延恩

按此縣志
文傳寫缺

單于大都護府

今為振武節度使理所

管單于大都護府麟州勝州東受降城管縣六

本漢定襄郡之盛樂縣也後魏都盛樂亦謂此城武德

四年平突厥于此置雲州貞觀二十年改為雲州都督府麟德三年改為單于大都護府垂拱二年改為鎮守使聖歷元年改置安化都護開元七年隸屬東受降城八年復置單于大都護府

府境

按府境里數傳寫缺

八到

西南取太原路至上都一千九百二十里東南至東都一千七百里

東南至河界靜邊軍一百二十里南至朔州三百五十里

西南至東受降城一百二十里北至黑沙磧口七百里

管縣一

金河

金河縣

中郭下

天寶四年置初景龍二年張仁愿于今東受降城置振武軍天寶四年節度使王忠嗣移于此城內置縣曰金河即後魏什翼犍所都盛樂之地道武帝遷都平城則今雲州所理是也

麟州

新秦下

禹貢雍州之域秦漢為雲中郡隋開皇二十年置榆林縣改為勝州天寶元年王忠嗣奏割勝州連谷銀城兩

縣置麟州

州境

按州境里數傳寫缺

八到

西南至上都一千四百六十里
東南至東都一千五百一十里

東至嵐州一百八十里
東至嵐州界黃河一百二十里河上有合水關

東北至勝州四百里
西南至銀州三百里

管縣三

新秦 連谷 銀城

新秦縣

中郭下

初漢武帝徙貧人于關中以西及朔方以南謂之新秦
天寶元年置以為縣取漢舊名也

連谷縣

中下南至州四十里

本漢囿陰縣地屬西河郡在今銀州儒林縣界隋文帝
于此置連谷鎮煬帝改為連谷戍大業十三年廢戍貞
觀八年于廢戍置連谷縣屬勝州天寶元年割屬麟州

連谷鎮縣理城中貞觀八年置

銀城縣

中下北至州四十里

本漢囿陰縣地屬西河郡漢末大亂匈奴侵邊雲中西河之間其地遂空訖于魏晉不立郡縣後魏時置石城縣廢帝改為銀城關周武帝保定二年移于廢石龜鎮城即今縣理是也貞觀因之屬勝州天寶元年屬麟州

勝州

榆林下府

按開元戶四千九十五

鄉十三

禹貢雍州之域春秋為戎狄地戰國時為晉趙地地理志云雲中立五原本戎狄地趙有之始皇分三十六郡為雲中郡漢因之不改按漢雲中在今州理東北四十里榆林縣界雲中故城是也漢末大亂匈奴侵邊其城遂空晉末屬赫連氏

赫連勃勃稱夏都于統萬按統萬城今在州理西南八百里夏州是

也後魏太武帝平赫連昌之後訖于周代往往置鎮不立郡縣隋文帝開皇三年于此置榆林縣七年又以榆林縣屬雲州二十年割雲州之榆林富昌金洞三縣置

勝州立嘉名也煬帝大業五年以勝州為榆林郡領榆林富昌金河三縣十五年郡人郭子和以城入突厥武德四年郭子和歸國其地又陷梁師都貞觀二年平師都三年仍隋舊理置勝州時柴紹劉蘭破滅匈奴奪得河南之地因置州以決勝為名

州境

按州境里數傳寫缺

八到

西南至上都一千八百五十三里
東南至東都一千九百四十里

西南至麟州四百里
西南至夏州九百里

南至銀州七百里
北至豐州七百里

貢賦

開元貢賦

女
藉布
麻

管縣二

榆林 河濱

榆林縣

中下郭下

本漢沙南縣地屬雲中郡漢末北虜侵擾歷魏晉及周
此地皆無縣邑隋開皇七年置榆林縣地北近榆林即
漢之榆溪塞因名屬雲州二十年改屬勝州皇朝因之

黃河西南自夏州朔方界流入

大葭蘆水縣西二百二十里

小葭蘆水縣西二百四十里其間地甚良沃

平河水首受黃河隋文帝開之以通屯倉

金河泊在縣東北二十里周迴十里

雲中故城在縣東北四十里趙雲中城秦雲中郡也史記曰趙武靈王北破林胡樓煩所置秦因之

隋榆林宮在州城內大業三年置因榆林郡為名其年

煬帝北巡陳兵塞表以威北狄因幸此宮突厥啓人可
汗獻馬及兵器新帳因賦詩云云

榆林關在縣東三十里東北臨河秦卻匈奴之處隋開
皇三年于此置榆林關

河濱縣

中下

本漢沙南縣地屬雲中郡迄于魏晉此地不立縣邑至
後魏及周復為銀城縣地隋時復為榆林縣地貞觀三
年于此置河濱縣東臨河岸因以為名改雲州為威州

立嘉名也八年廢威州以縣屬勝州

黃河在縣東一十五步闊一里不通船楫即河濱關渡
河處名君子津

河濱關在縣東北貞觀七年置

東受降城本漢雲中郡地在榆林縣東北八里今屬振

八到

城南至上都一千八百六十八里
東南至東都取單于路一千八百二十里

武節度

按北至單于都護府一百二十里
東北至朔州四百里

西至中受降城三百里
北至磧口八百里

武川城今名里城後魏六鎮從西第三鎮在軍北三百里自北出石門障即光祿城右入匈奴大路

光祿城東北有懷朔古城其城即後魏六鎮從西第二鎮在今中城界向北化柵側近也

豐州

九原下府

案開元戶一千九百 鄉五

今置都防禦使

管豐州天德軍西受降城中受降城 管縣二

其都防禦使及天德軍使理在西城今移理舊天

德軍城

禹貢雍州之域秦上郡之北境秦末沒胡漢武帝元朔二年使衛青逐去匈奴開置朔方領縣十理三封在今豐州西一百里後漢因之靈帝末羗胡擾亂城邑皆空永嘉後匈奴衛辰父子新居其地辰子赫連勃勃自稱大單于統萬城地屬勃勃後魏太武帝擒滅赫連昌置統萬鎮孝文帝改置夏州其地又為夏州之北境周武帝于今永豐縣置永豐鎮隋文帝開皇三年于鎮置豐

州後廢貞觀四年突厥降附又權于此置豐州都督府
不領縣惟領蕃戶以史大奈為都督十一年大奈死復
廢府以地屬靈州二十二年又分置豐州永徽九年于
州復重置永豐縣四年于郭下又置九原縣麟德元年
又置豐安縣天寶元年改為九原郡乾元元年復為豐

州

州境

按州境里
數傳寫缺

八到

南至上都一千八百里
東南至東都二千一百九十里

東至勝州五百三十里

西南至靈州九百里

東南至夏州七百五十里

西北至河西城八十里

貢賦

開元貢

野馬皮
布麻

管縣二

九原 永豐

九原縣

中下郭下

本漢之廣牧舊地東部都尉所理其九原縣永徽四年
重置其城周隋間俗謂之甘草城

永豐縣

中下州西一百十六里

本漢臨戎舊地後漢末廢北人又謂之賀葛真城周武帝保定三年于此置永豐鎮隋開皇五年廢鎮置永豐縣武德六年省永徽九年復置

廢豐安縣在州東南四十里隋開皇六年于縣置豐安鎮麟德元年改為豐安縣天寶末廢

天德軍

舊理在西受降城權置軍馬于永清柵元和元年詔移理舊城

本安北都護貞

觀二十一年于今西受降城東北四十里置燕然都護

以瀚海等六都督臯蘭等七州並隸焉龍朔三年移于磧北回紇本部仍改名瀚海都護總章二年又改名安北都護尋移于甘平東北一千一十八里隋故大同城鎮垂拱元年置同城鎮其都護權移理刪丹縣西南九十九里西安城景龍二年又移理西受降城開元十年又移理中受降城天寶八年張齊丘又于可敦城置橫塞軍又自中受降城移理橫塞軍十二年安思順奏廢橫塞軍又于大同川西築城置軍玄宗賜名曰大安軍

十四年築城功畢移大安軍理焉乾元後改為天德軍緣居人稀少遂西南移三里權居永清柵其理所又移在西受降城自後頻為河水所侵至元和八年春黃河泛溢城南面毀壞轉都防禦使周懷義上表請修築約當錢二十一萬貫中書侍郎平章事李吉甫密陳便宜以西城費用至廣又難施功請修天德舊城以安軍鎮其大略曰伏以西城是開元十年張說所築今河水來侵已毀其半臣量其事勢不堪重修若別築新城所費

殊廣計其人功糧食及改屋宇比及事畢不下三十萬
貫錢此但計費猶未知出入之處城南面即為水所壞
其子城猶堅牢量留一千人足得住居天德軍士合抽
居舊城豈可更勞版築虛棄錢物若三城是國家盛制
仁愿舊規亦須得天德添兵然後有人修築按天德舊
城在西城正東微南一百八十里其處見有兩城本是
永清柵即隋氏大同城舊理去本城約三里以下城甚
牢小今隨事制宜仍存天德軍額北城周迴一十二丈

高四丈下闊一丈七尺天寶十二載安思順所置其城
居大同川中當北戎大路南接牟那山南又是麥泊其
地良沃遠近不殊天寶中安思順郭子儀等本築此城
擬為朔方根本其意以中城東城連振武為左翼又以
西城豐州連定遠為右臂南制党項北制匈奴左右鉤
帶居中處要誠良久之規也尋屬祿山有事子儀留老
弱于此城身率大衆河北討賊為賊將宋星星所破繼
火焚燒遂移天德軍永清柵別置理所于西城只緣添

兵未得且因循併在一處力所不足實非遠圖臣久訪
略已計料約修此城不過二萬貫錢今若于天德舊城
隨事增飭因有移換仍取城隸于天德軍別置使名自
為雄鎮以張聲勢可警殊鄰詔從之于是復移天德軍
理所于舊城焉先是緣邊居人常苦室韋党項之所侵
掠投竄山谷不知所從及新城施功之日遂有三萬餘
家移止城內初議者又慮城大無人以實及是遠近奔
湊邊軍益壯人心遂安沃野故城在軍城北六十里即

是後魏時六鎮從西第一鎮也

八到

西取寧遠鎮故落鹽池經夏州至上都一千八百里

西南渡河至豐州一百六十里

西北至橫塞軍城二百里

西至西受降城一百八十里

西南至新宥州六百里

東南至中受降城二百里

中受降城本漢九原郡地漢武帝元朔二年更名五原
開元十年于此城置安北大都護府後又移徙事具天
德軍

八到

城南至上都一千八百六十里
東南至東都取單于路二千一百二十里

東至東受降城二百里

西北至天德軍二百里

南至麟州四百里

北至磧口五百里

敬本故城在中城北四十里鄭虔軍錄曰時人以張仁
愿河外築二城自古未有今敬本城周一萬八百七十
二步壕塹深峻亦古之堅守賈耽古今述曰以地理求
之前代九原郡城也

西受降城

舊天德軍理于此城元
和九年移理天德軍城

在豐州西北八十里

蓋漢朔方郡地臨河縣故理處開元初為河水所壞至

開元十年總管張說于故城東別置新城今城

一本云其後城

西南隅又為河水所壞本末具天德軍

八到

城南至上都一千八百八十里
東南至東都取單于路二千二百五十里

正東微南至天德軍一百八十里
東南渡河至豐州八十里

西南至定遠城七百里

北至磧口三百里

磧口西至回鶻衙帳一千單五里

右三受降城景雲三年張仁愿所置也初突厥入寇朔

方軍總管沙吒忠義為賊所敗詔仁愿代之先是朔方軍北與突厥以河為界河北岸有拂雲堆神祠突厥將入寇必先詣祠祭酹求福因牧馬料兵而後渡河時突厥默啜盡衆西擊突騎施婆葛仁愿奏請乘虛奪取漢南之地于河北築三受降城首尾相應絕其南寇之路太子少師唐休璟以為兩漢以來皆北守黃河今于寇境築城恐勞人費功終為賊所有仁愿固請不已中宗竟從之仁愿表留年滿鎮兵以助其功時咸陽兵二百

餘人逃歸仁愿擒獲盡斬之軍中股慄六旬而三城俱就以拂雲祠為中城與東西兩城相去各四百餘里遙相應接北拓三百餘里于牛頭牟那山北置烽堠一千八百所自是突厥不得度山放牧朔方無復寇掠滅鎮兵數萬人初三城不置壅門及卻敵戰具或問曰邊城禦賊之所不為守備何也仁愿曰寇若至此當併力出戰迴顧望城猶須斬之何用守備生其退惡之心其後常元楷為總管始築壅門議者劣之

元和郡縣志卷五

欽定四庫全書

元和郡縣志卷六

唐 李吉甫 撰

河南道一

河南府

洛州東都

開元戶一十二萬七千四百四十
元和戶一萬八千七百九十九

鄉二百
鄉八十

禹貢豫州之域在天地之中故三代皆為都邑陽翟夏
城禹都也偃師西亳湯都也周成王定鼎于郊鄆使召

公先相宅乃卜澗水東瀍水西是為東都今苑內故王城是也又卜瀍水東召公往營之是為成周今河南府東故洛城是也至赧王獻地于秦莊襄莊襄王立為三

川郡

三川伊洛河也

漢改為河南郡後漢光武帝建武元年入

洛陽遂定都焉及董卓逼遷獻帝西都長安盡燒洛陽宮廟後又都焉魏文帝受禪亦都洛陽陳留王以司隸校尉所掌置司州領河南河東河內弘農平陽五郡晉武帝受禪司州不改永嘉初劉曜叛亂司州沒胡後又

沒于石勒東晉穆帝永和元年桓溫入洛陽置河南郡
宋武帝北平關洛復置司州後魏孝文帝太和十九年
六宮文武盡遷洛陽改為河南尹至周宣帝移相州六
府于洛州以為東京隋文帝改六府為六尚書省又置
河南道行臺省仁壽四年煬帝詔楊素營東京大業元
年新都成遂徙居今洛陽宮是也其宮北據邙山南直
伊闕之口洛水貫都有河漢之象東去故城一十八里
初煬帝嘗登邙山觀伊闕顧曰此非龍門耶自古何因

不建都于此僕射蘇威對曰自古非不知以俟陛下帝
大悅遂議都焉其宮室臺殿皆宇文愷所創也愷巧思
絕倫因此制造頗窮奢麗前代都邑莫之比焉又改洛
州為豫州置牧三年罷州為河南郡置尹四年改東京
為東都十四年復置洛州隋亂王世充僭號稱鄭改為
司州武德四年討平充復為洛州仍置總管府其冬罷
府置陝東道大行臺太宗為大行臺尚書令九年罷臺
置洛州都督府貞觀十八年廢府顯慶二年置東都則

天改為神都神龍元年復為東都開元元年改洛州為

河南府天寶元年改東都為東京至德元年復為東都

府境

東西六百二十一里
按南北里數傳寫缺

八到

西至上都八百五十里
東至鄭州二百八十里

東北至懷州一百五十里

西北至陝州三百五十里

東南至汝州一百七十里

西南取崕嶺路至陽翟縣二百四十里從縣至許
州九十里

貢賦

開元貢賦

綾絹

絹綿

白瓷器

管縣二十六

洛陽 河南 偃師 緱氏 鞏 伊闕

密 王屋 長水 伊陽 河陰 陽翟

潁陽 告成 登封 福昌 壽安 澠池

永寧 新安 陸渾 河陽 溫 濟源

河清 汜水

洛陽縣

赤郭下

本秦舊縣歷代相因貞觀六年自金墉城移入郭內毓

德坊今理是也神龍初改為永昌尋復舊號

故洛陽城在縣東二十里按華延儒云洛陽城東西七里南北九里洛陽城內宮殿臺觀府藏寺舍凡有一萬一千二百一十九門自劉曜入洛元帝渡江官署里間鞠為茂草後魏孝文帝太和十七年幸洛陽巡故宮遂咏黍離之詩為之流涕觀石經仍定遷都而經始洛京十九年九月新都始立于是六宮文武盡遷洛陽

洛水在縣西南三里西自苑內上陽之南瀕漫東流宇

文愷築斜堤束令東北流當水衝捺堰九折形如偃月
謂之月坡今雖漸壞尚有存者

河南縣

赤郭下

本漢舊縣後魏靜帝改為宜遷縣周宣帝復為河南隋
仁壽四年遷都移縣于東都城內寬政坊即今縣是也
永昌元年以明堂初成改為合宮縣神龍初復舊二年
復為合宮景雲初復舊

洛水在縣北四里伊水在縣東南十八里

瀘水在縣西北六十里禹貢曰伊洛瀘澗既入于河孔安國注曰出河南北山水經云源出河南穀城縣北今驗水西從新安縣東入縣界

天津橋在縣北四里隋煬帝大業元年初造此橋以架洛水用大船維舟皆以鐵鎖鉤連之南北夾路對起四樓其樓為日月表勝之象然洛水溢浮橋輒壞貞觀十四年更令石上累方石為腳爾雅斗牛之間為天漢之津故取名焉

中橋咸通三年造累石為腳如天津橋之制

通津渠在縣南三里隋大業元年分洛水西北名千步

磧渠又東北流入洛水謂之洛

按此下有缺文

偃師縣

畿西南至府七十里

本漢舊縣帝嚳及湯盤庚並都之商有二亳成湯居西亳即此是也至盤庚又自河北徙理于亳商家從此而改號曰殷武王伐紂于此築城息偃戎師因以名焉天寶七年四月河南尹韋濟奏于偃師縣東山下開驛路

通孝義橋廢北坡義堂路焉

北邙山在縣北二里西自洛陽縣界東入鞏縣界舊說云北邙山是隴山之尾乃衆山總名連嶺修互四百餘里

首陽山在縣西北二十五里

盟津在縣西北三十一里

緱氏縣

次赤西北至府六十三里

本漢舊縣古滑國也左傳曰秦師滅滑其後屬晉至秦

漢為縣因山為名隋大業十年移據公路澗西憑岸為城即今縣是也

緱氏山在縣東南二十九里王子晉得仙處

轅轅山在縣東南四十六里左傳欒盈過周王使候出諸轅轅注曰緱氏縣東南有轅轅關道路險隘凡十三曲將去復還故曰轅轅後漢河南尹何進所置八關此其一也

鄂領坂在縣東南三十七里晉八王故事曰范陽王保

于鄂坂後于其上置關

洛水自西洛陽縣界流入

曹城在縣東一里曹操與袁術相拒築城于此

袁術固一名袁公塢在縣西南十五里宋武北征記曰
少室山西有袁術固可容十萬衆一夫守隘萬人莫當
公路壘在縣南三里袁術與曹公相拒處

鉤鑠故壘在縣東北七里宋書司馬休之從宋公西征
營于柏谷塢西即此壘相連如鎖因以為名也

鞏縣

畿西至府一百四十里

古鞏伯之國也春秋晉師剋鞏戰國時韓獻子秦至漢以為縣屬河南郡隋大業十三年李密自潁川率羣盜十餘萬襲破洛口倉因據鞏縣仍築城斷洛川包南北山週迴三十餘里屯營其中後為王世充所破縣本與成臯中分洛水西則鞏東則成臯後魏併焉按爾雅鞏固也四面有山河之固因以為名

天陵山在縣東南六十里

黃河西自偃師縣界流入河于此有五社渡又有五社
津後漢朱鮪遣賈强從五社津渡是也

洛水東經洛汭北對瑯邪渚入河謂之洛口亦名什谷
張儀說秦王下兵三川塞什谷之口即此也

伊闕縣

畿北至府七十里

古戎蠻子國漢為新城縣屬河南郡周武帝時屬伊川
郡隋開皇十八年罷郡改為伊闕縣

伊闕山在縣北四十五里兩山相對望之若闕伊水流

其間故名

陸渾山俗名方山在縣西五十五里

伊川西自陸渾縣界流入左傳秦晉遷陸渾之戎于伊川是也

伊闕故關在縣北四十五里何進八關之一

密縣

畿西南至府一百一十里

本漢舊縣古密國也春秋諸侯伐鄭圍新密漢屬河南郡隋大業二年廢十二年又置武德三年于此置密州

四年廢州以縣屬鄭州龍朔二年割屬河南府爾雅曰山如堂者曰密因以為名

大隗山在縣東南五十里本具茨山黃帝見大隗于具茨之山故亦謂之大隗山澗水源出于此

馬嶺山在縣南十五里洧水所出

王屋縣

畿東南至府一百里

本周時召康公之采邑漢為垣縣地後魏獻文帝分垣縣置長平縣周明帝改為王屋縣因山為名仍于縣置

王屋郡天和元年又為西懷州隋開皇三年改為邵州
大業三年廢邵州以縣屬懷州顯慶二年割屬河南府
齊之嶺在縣東十二里即宇文周與高齊分據境之處
也

黃河在縣南五十里

王屋山在縣北十五里周迴一百三十里高三十里禹
貢底柱析城至于王屋是也

析城山在縣西北六十里峯四面其形如城有南門焉

故曰析城

長水縣

畿東至府二百三十里

本漢盧氏縣地後漢晉宋不改後魏宣武帝分盧氏東

境置南陝縣屬弘農郡西魏廢帝改為長淵隋義寧元

年以犯高祖廟諱改為長水貞觀八年自虢州割屬穀

州顯慶二年屬河南府

穀州今新安縣所理是也

伊陽縣

畿北至府二百六十里

本陸渾縣南界之地先天元年割置伊陽縣

伊水路在縣西南出鸞掌山東流水經云出南陽魯縣
蔓蕩山東北過陸渾縣南又東北過伊闕中又東北入
于洛多雨暴漲諸峽東水之處其高或七八丈故伊闕
石壁有石銘云黃初四年六月二十四日辛巳大水出
高四丈五尺

銀鉶窟在縣南五里今每歲稅銀一千兩

河陰縣

望西南至府二百三十里

本漢滎陽縣地開元二十二年以地當汴河口分汜水

滎澤武陟三縣地于輸場東置以便運漕即侍中裴耀卿所立初耀卿為宣州刺史開元十八年因朝集上便宜曰竊見江淮諸州所送租庸等本州正月二月上道至揚州入斗門即逢水淺停留一月以上四月以後始渡淮入汴多屬乾淺又搬運停留至六月七月方至河口即遇黃河漲溢不得入河又須停一兩月待河水較小始得上河入洛即又漕洛乾淺船艘不通計從江南至東都停滯日多得行日少艱辛欠折因此而生伏見

國家舊法河口元置武牢倉江南船不入黃河即于倉內便貯也鞏縣置洛口倉從黃河不入漕洛即于倉內安置爰及河陽倉柏崖倉太原倉永豐倉渭南倉節級取便例皆如此水通利則隨近運轉不通利則且納在倉不滯遠船不生隱盜每年剩得一二百萬石即數年之外倉廩轉加至二十二年以耀卿為相兼轉運都使于是遂分置河陰縣及河陰倉又河清縣置柏崖倉三門東置集津倉三門西置鹽倉三門北鑿山十八里陸

行以避湍險自江淮來者悉納河陰倉自河陰候水調浮漕送含嘉倉又取曉習河水者遞送太原倉所謂北運也自太原倉浮渭以實關中凡三年運七百萬石省腳三十萬貫及耀卿罷相後緣北路險澁頗為隱欺議者言其不便事又停

汴渠在縣南二百五十步亦名葭蕩渠禹塞滎澤開渠以通淮泗後漢初汴河決壞明帝永平中命王景修渠築隄十里立一水門令更相注洄無復潰漏之患自宋

武北征之後復皆堙塞隋煬帝大業元年更令開導名
通濟渠自洛陽西苑引穀洛水達于河自板渚引河入
汴口又從大梁之東引汴水入于泗達于淮自江都宮
入于海亦謂之御河河畔築御道樹之以柳煬帝巡幸
垂龍舟而往江都自揚益湘南至交廣閩中等州公家
運漕私行商旅舳艫相斷隋氏作之雖勞後代實受其
利焉

汴口堰在縣西二十里又名梁公堰隋文帝開皇七年

使梁睿增築漢古堰過河入汴也

三皇山亦曰數高山上有三城即劉項相持處春秋左

氏傳曰晉師在敖鄆之間亦此也

陽翟縣

畿西北至府二百四十里

本夏禹所都春秋時鄭之櫟邑韓自宜陽移都于此秦

為潁川郡楚漢之際韓公子成為韓王項羽殺成立鄭

昌漢元年又誅昌立橫野君信六年徙信太原公復置

潁川郡領縣二十理陽翟

潁川屬縣

後魏復置陽翟郡隋開

皇十六年廢郡置嵩州以縣屬焉大業三年隸襄城郡
武德中又隸嵩州貞觀元年廢入許州建都後改屬河
南府

釣臺在縣南十五里左氏傳曰夏啓有釣臺之饗也

潁陽縣

畿西北至府九十里

古綸氏縣本夏之綸國也少康之邑在焉漢屬潁川晉
省後魏太和中于綸氏縣城置潁陽縣屬河南郡又分
潁陽置瑤陽縣隋開皇六年改瑤陽為武林十八年又

改為綸氏大業元年改為嵩陽載初元年又改為武林
開元十五年改為潁陽

大石山一名萬安山在縣西北四十五里

倚箔山望之如立箔山西北崖下有鍾乳隋時充貢
陽乾山在縣東二十五里潁水一源出陽乾山

大谷口在縣西北三十五里孫堅停兵大谷距洛陽九
十里即此谷

大谷故關在縣西北四十五里何進八關之一也

告成縣

畿西北至府一百七十里

本漢陽城縣屬潁川郡因陽城山為名後魏置陽城郡屬司州隋開皇三年廢郡以縣屬洛州十六年于此置嵩州仁壽四年省嵩州以縣屬河南郡萬歲登封元年則天因封中岳改名告成

許由山在縣西十三里

嵩高山在縣西北二十三里

少室山在縣西北五十里

陽城山在縣東北三十八里

鬼谷在縣北五里即六國時鬼谷先生所居也

測景臺在縣城內西北隅高一丈開元十年詔太史監
南宮說立石表焉

登封縣

畿西北至府一百三十五里

本漢嵩高縣武帝元封元年置以奉太室後省入陽城
累代因之高宗將有事于中岳分陽城緱氏置嵩城縣
萬歲登封元年則天因封岳改為登封

嵩高山在縣北八里亦名方外山又云東曰太室西曰少室嵩高總名即中岳也山高二十里周迴一百三十里

少室山在縣西十里高十六里周迴三十里潁水源出焉

潁水有三源右水出陽乾山之潁谷中水導源少室通阜左水出少室南溪東合潁水

啓母祠縣東北七里漢書武帝祀中岳見夏啓母石是也應劭云啓生而母化為石淮南子亦同嵩山記陽翟婦人今龕中鑿石像其石漢安帝延光三年立

福昌縣

畿東至府一百五十里

古宜陽地春秋時屬晉七國時屬韓漢以為縣屬弘農
郡後漢建武三年馮異破赤眉于崤底餘衆走向宜陽
帝自征之赤眉君臣面縛即此地也隋義寧二年于此
置宜陽郡武德元年改為穀州改宜陽縣為福昌縣取
縣西隋宮為名顯慶二年廢穀州以縣屬河南府今縣
城即魏一全塢城東南北三面天險峭絕後周置重兵
于此以備高齊

女几山在縣西南三十四里

壽安縣

畿東北至府七十六里

本漢宜陽縣地後魏分新安置甘棠縣隋開皇三年以縣屬熊州十六年改為穀州仁壽四年改名壽安縣貞觀七年改屬河南府

石墨山在縣西南三里山石如墨可以書

洛水西自福昌縣界流入

少水今名慈澗水出縣北

八關故城在縣東北三十里後魏靈帝中平元年以河南尹何進為大將軍將五營士屯都亭置玉關廣城伊闕大谷轅轅旋門小平津孟津等八關都尉官理于此永濟橋在縣西十七里煬帝大業三年置架洛水隋亂毀廢貞觀八年修造舟為梁長四十丈三尺廣二丈六尺

澠池縣

畿東至府一百五十里

本韓地哀侯東徙其地入秦漢以為縣屬弘農郡隋文

帝時屬熊州

今河南府福昌縣是也

十六年改屬穀州顯慶二年

廢穀州縣屬河南府

廣陽山亦名澠池山在縣東北五十五里

穀水南去縣二百步東經秦趙二城俗謂之俱利城

東城在縣四十三里

西城在縣西四十里昔秦趙會於澠池之處

大塢故城在縣北十五里後魏武帝入關使行臺楊騰出關安撫騰因舊城置大塢鎮

永寧縣

畿東至府二百里

漢澠池縣之西境後漢晉宋不改後魏文帝于今縣東四十里置北宜陽縣屬宜陽郡廢帝二年改為熊耳縣義寧二年置永寧縣屬宜陽郡貞觀元年改屬河南府二嶠山又名欽崙山在縣北二十八里春秋時秦將襲鄭蹇叔哭送其子曰晉人禦師必于嶠嶠有二陵其南陵夏后臯之墓北陵文王之所避風雨必死是間漢建安中曹公西討巴漢惡其險更開北山道路多從之路

側有石銘曰晉太康三年弘農太守梁柳修復舊道西
征記嶠上不得鳴鼓角鳴則風雨總至自東嶠至西嶠
三十五里東嶠長坂數里峻阜絕澗車不得方軌西嶠
全是石坂十二里險絕不異東嶠漢馮異破赤眉于嶠
底魏龐德破張白騎于兩嶠間

熊耳山在縣東北四十五里後漢世祖破赤眉積甲宜
陽縣城西與此山齊按禹貢導洛自熊耳在商州上洛
縣界與此別也

穀陽山在縣西北五十五里漢書地理志穀水出穀陽山

回谿俗名迴坑在縣東北三十六里馮異與赤眉戰敗于此璽書勞曰始垂翅于迴溪終奮翼于澠池可謂失之東隅收之桑榆

新安縣

畿東至府七十里

本漢舊縣屬弘農郡晉改屬河南郡後魏屬新安郡周武帝保定三年省新安郡又于今縣理置中州建德六

年省中州又置新安郡隋開皇十六年改置穀州貞觀元年新安屬河南府

穀水在縣南二里國語曰穀洛鬪壞王宮是也縣城本名通洛城周武帝將東討令陝州總管尉遲綱築此城以臨齊境

白超故城一名白超壘一名白超塢在縣西北十五里壘當大道左右有山道從中出漢末黃巾賊起白超築此壘以自固東魏修築為城因名白超城

函谷故關在縣東一里漢武帝元鼎三年為楊僕徙關
于新安按秦函谷關在今陝州靈寶縣西南十二里以
其道險隘其形如函故曰函谷項羽坑秦降卒于新安
即此地今縣城之東有南北塞垣楊僕所築

慈澗故鎮在縣東南二十里周武帝保定六年置武德
三年討王世充前軍鎮此太宗以輕騎擊破之充拔鎮
歸于東都

陸渾縣 縣東北至府一百三十里

本陸渾戎所居春秋時秦晉遷陸渾之戎于伊川至漢
為陸渾縣屬弘農郡後屬河南尹後魏改為伏流縣隋
大業元年省伏流縣移陸渾縣于今理

三塗山在縣西南五十里左傳曰四嶽三塗陽城大室
九州之險

明臯山在縣東北十五里

伊水在縣西南自虢州盧氏縣界流入

伏流城即今縣理城東魏孝靜帝武定二年所築以城

北焦澗水伏流地下西有伏流坂因以為名

河陽縣

望西南至府八十里

自河陽以下五縣今權隸三城節度

本周司寇蘇忿生之邑後為晉邑在漢為河陽縣屬河
內高齊省入溫軹二縣隋開皇十六年分溫軹二縣重
置屬懷州武德四年平王世充後割屬河南府

南城在縣西四面臨河即孟津之地亦謂之富平津後
魏使高永樂守河南以備西魏即此也周隋為宮貞觀

置鎮

中渾城東魏孝靜帝元象元年築之仍置河陽關天寶以前亦于其上置關縣西南十三里古遮馬堤即後魏爾朱榮殺朝士千三百餘人于此謹按至德中史思明之來寇也時李光弼已至東都聞思明將至乃移牒留守及河南尹并留司官坊市居人令悉出避寇空其城乃率麾下士馬數萬東守河陽三城拒逆賊黨初謂光弼自洛而西及聞保河陽出其慮外疑懼久之不敢犯

宮闕光弼訓練招集威聲大震賊雖入城憚光弼兵威
南不出百里西不越畿內陝州得修戎備關隘無虞皆
光弼保河陽之力故自乾元以後常置重兵貞元後加
置節度為都城之巨防造浮橋架黃河為之以船為腳竹簰互
之晉陽秋云杜元愷造河橋于富平津即此是也船簰出洪州
溫縣

望東南至府一百三十里

本周畿內司寇蘇公之邑春秋周襄王賜晉文公漢以
為縣屬河內郡隋大業十三年自故溫縣移于今所皇

朝建都割屬河南府

濟源縣

望南至府一百二十里

古軹邑屬魏秦昭王時代魏取軹漢文帝時封薄昭為軹侯屬河內郡隋開皇十六年分軹縣置濟源縣屬懷州以濟水所出因名顯慶二年割屬河南府

濟水在縣西北三里平地而出有二源其東源週迴七百步深不測西源週迴六百八十五步深一丈皆繚之以周牆源出王屋山海經云王屋之山漣水出焉郭璞

注云瀕沅水之源尚書禹貢云導沅水東流為濟入于河溢為滎孔安國注云濟水入河並流十數里而南截河又並流數里溢為滎澤漢書導沅水東流為沛入于河軼為滎東出于陶丘北又東至于荷又東北會于汶又北東入于海顏師古云沅水流而為濟截河又為滎澤陶丘在曹州定陶西南荷即荷澤過荷澤又與汶水會北折而東入于海也按沅水出今王屋縣王屋山東流至濟源縣而名濟水滎澤在今鄭州滎澤縣定陶今

曹州濟陰縣也荷澤在今兗州魚臺縣汶水出今兗州萊蕪縣然濟水因王莽末旱渠涸不復截河南過今東平濟南淄川北海界中有水源入于海謂之清河實荷澤汶水合流亦曰濟河蓋因舊名非本濟水也而水經是和帝以後所撰乃言濟水南過滎澤至于垂氏等縣一依禹貢舊道斯不詳之甚也酈道元又從而注之尤為紕繆矣

百尺溝在縣東北六里引濟水溉灌仁壽三年置初分

功人穿十丈故名百尺溝

河清縣

畿南至府六十里

本漢軹縣地縣西有柏崖故城即東魏將侯景所築武德初于城東置大基縣八年省咸亨四年重置先天元年以犯玄宗廟諱改名河清

汜水縣

望西南至府一百八十里

古東虢國鄭之制邑漢之成臯縣一名虎牢穆天子傳曰天子獵于鄭圃有獸在葭中七萃之士擒之以獻天

子命畜之東號因曰虎牢漢楚之際項羽使海春侯曹咎守此漢王破之咎自殺至宋武帝北平關洛置司州刺史理虎牢魏使奚斤攻宋司州刺史毛德祖經二十日不剋城中傷者無血知其乏水潛作地道其穴猶存隋開皇十八年改成臯為汜水縣大業十三年陷于王世充武德四年討平充復于縣理置鄭州貞觀七年移鄭州于營城以縣屬焉顯慶二年改屬河南府垂拱四年改名廣武縣神龍元年復為汜水開元二十九年自

虎牢城移于今理

黃河自鞏縣流入

汜水出縣東南三十二里浮戲山經虎牢城東漢破曹
咎于此

成臯故關在縣東南二里

旋門關在縣西南十里即八關之一

汴口去縣五十里今屬河陰

坂渚在縣東北三十五里初竇建德衆數十萬自于坂

渚結陣南屬鵲山以臨汜水太宗帥輕騎擊之賊衆大潰建德竄于牛口渚將軍白士讓生獲之先是童謠云
豆入牛口勢不得久果敗于此牛口渚與坂渚邈迤相接

等慈寺在縣東七里王師既破建德詔于戰所起寺立碑紀功焉令顏師古為碑文

元和郡縣志卷六